



國家清史編纂委員會・文獻叢刊

清代詩文集彙編

國家清史編纂委員會・文獻叢刊

清代詩文集彙編

《清代詩文集彙編》編纂委員會 編

上海古籍出版社

清代詩文集彙編 六四五

味諫果齋集六卷 王汝金撰

一

仙心閣詩鈔八卷 彭慰高撰

一六七

仙心閣文鈔二卷附紀時略 彭慰高撰

二六七

眉綠樓詞八卷 顧文彬撰

三一七

劬書室遺集十六卷 金錫齡撰

四五三

張文達公遺集四卷 張之萬撰

六三五

庚子劫餘草一卷 居巢撰

七〇三



光緒八年冬
開彫於錢江

之江王子醉墨璠璣器重冰雪神清活潑心源雅擅明
湖之秀嵌空意陣獨鍾靈苑之奇承江左之遺風紹漢
南之家學瓊霄立幹非同蕙茁蘭芳碧落流音不比猿
吟鶴唳此固賦畀之獨優而不煩人力之雕琢乃王子
益切磨礪不矜敏悟目耕芸圃心搆蘭林挹柳編蒲截
之精爲海立雲垂之詠雖持籌握算莫卻塵氛而對酒
當歌愈饒雲興是知丹以九還而見寶劍因萬濯而稱
神見者或歎爲天成或驚爲神助不知其蘊於內者深

味諫果齋集

沈序

一

故現於外者顯也顧余與王子情親趣洽交淡知深見
夫席溫枕扇度著申天容婉氣和誠昭勤懇吾知其天
性之彌淳驛使傳梅雁影結雲霞之契管城擲藻魚紋
多風雨之懷吾見其麗情之彌厚而且處事如流則才
堪華國鑒觀不爽則智足衡人藹若春和則矜張悉化
爽同秋朗則曠達羣推是王子固不藉詩以見長而詩
特爲王子之餘事然而出其小技已堪破石驚天發爲
浩歌洵足鞭山撻海擲管而麟毫泉湧攤箋而麝墨香

噴或論古斟今或此酬彼唱或心傷燕舞或腸斷鸞飛
摘來屈豔班香躡千古才華之上抹倒宋風謝月愧一
時淹雅之徒篆鼎彝鐘未足方其古質風檣陣馬未足
擬其奔馳時花美女未足比其鮮妍牛鬼蛇神未足喻
其奇幻實眾善之兼備非一格之可拘夫豐山之鐘響
鳴谷應赤城之霞采絢天榮他年價貴雞林解來老嫗
指日名傳 鸞掖才重宮人是王子雖不藉詩以見長
而詩即可卜王子之榮遇也猗歟休哉錦心繡口君真

味諫果齋集

沈序

二

不減盧綸儉腹枯腸余實深慚李益望詞壇而怯惡應
遜千籌看筆陣之縱橫避君三舍乃轉委以先聲之噓
矢首路之引嚶里嫗村姑何敢企施嬌之盼錫簫粥鼓
不足邀倫曠之聰顧匠師既不棄夫菲材小子敢恣言
夫一序明知月升東海早掩星光庶幾雲近太陽藉成
金色謹綴數語用附千秋道光二十一年歲次辛丑愚
妹婿仲復沈秉成拜序

綠柳送人青山笑我尺波搖漾載來一段春愁列岫迴
環盼斷二分明月冰雪擊艇風沙淅巾帆欲怯行橋危
礙進蓋不免吟念家山而結轡賦行路難而鬱伊焉於
仲春八日乃抵東臺醉墨表兄重聯舊雨倍洽親情延
東閣之賓下北窗之榻沾到梅花之酒盡滌塵襟烹來
松葉之茶頓清詩思出所著詩索余弁言受而讀之潭
空瀉月山深駐雲花寒疑語煙流欲聲情以蘊而愈深
旨以雋而彌永揮來玉塵不愧家風檢到縹緲原爲舊

味諫果齋集

蔣序

一

物此其所以因心造境觸手生春也使其汁染柳衣夢
兆蓉鏡雲奏五色花簪一枝將見鸚鵡才雄麒麟筆健
太白遇知章而望重東坡逢歐九而名彰紅袖拂餘竝
許狀頭之句碧紗籠處爭傳學士之詩而乃鵬搏翺歆
鯉躍腮暴玉韜瘡賈珠寒閣淵逐隊空忙打包依舊遂
至耽吟成癖入醋甕而未知積忿難調擊唾壺而欲碎
也重以秦簫罷響湘瑟隕絃鴛鴦乍涼蓮萼雙墜淚枯
惟泣心酸不寒草木有情應知有恨鶯花無主定亦無

聊遣鈿匣光翠怨雲鏤故劍沈影香愁雨殘能無傷奉
倩之神增黃門之感哉時或山程水郵朝霞夕照年年
羈旅歲歲征人采到卷施知是傷心之草折將楊柳原
非稱意之花繾綣懷人泣瓊瑰而欲滴低徊念別望白
雲而情馳屹帖有吟海江製賦錢塘風月轉動羈愁閨
嶠煙霞又牽離思情詞斐惻哀怨足以動人矣又或枕
簟店欺藥爐泉沸鶴寒支骨蟬冷咽秋維摩本善病之
身武子況鍾情之輩潮生檣夢花落釀愁知倚閭有望

味諫果齋集

蔣序

二

子之人奈炊日致傷心之證淚絲點點與露俱懸心旌
搖搖不風而颺旋二豎之潛逸趨千里兮承歡廣華黍
而有聲歌白華而奉養迨至劉晏以理鹽得宦長卿以
納貲爲郎已非親在之年又值兵興之候紅羊劫轉金
粉灰飛青鳥信來黃巾賊滿問故巢而焉在喜弱息之
尙存玉鏡仍完金玦竟復珠猶在浦玉未沈淵奔命雖
勞攜家得聚兵戈漸遠星霜載行裝如葉輕賸琴書兮
無恙興隨花萎惟筆硯之未焚聊寫馬周逆旅之心豈

效阮籍窮途之哭耶而況青氍尙在玉樹齊芳鳳有雛
聲鶴多子和宋昭五女羣擅雕龍蘇珽兩兒並能繡虎
兼之徐淑善畫蘇蕙工吟琴得諧聲遂非孤響應共義
之作達不須粲也工愁桐雖爨而將焦器以鍊而益利
旗鼓重整請擊銅斗而高歌壁壘更新且埽苔紋而題
句咸豐六年歲次丙辰仲秋上澣愚表弟蔣恭亮拜撰

味諫果齋集

蔣序

三

夫華實之才難兼而風騷之道斯淹儉腹者喜性靈曰使老嫗能解夸目者尙典雅曰字字有來歷使老嫗能解則驍壺伴侶得寶胡騰卽香山乎字字有來歷則摺撫廣韻搜牢皇覽卽韓杜乎姝姝自悅二者交譏萃於光緒元年夏奉檄來掘浦得識先生相從餘五閱月蒙禮遇甚渥復出示所著味諫果齋詩集且索弁言王仲寶令任昉點正顏師古使道衡指摘古今大才人往往心虛若谷而萃則十餘年來奔走衣食案頭塵積寸許

味諫果齋集

王序

一

且無心洒浩更何堪爲康樂正坐長吉負囊乎然一披覽如入華鬘市深齎盈眸如游護世城鮮肥果腹如夢釣天所廣奏動心如詣華林園幽芳撲鼻而一種悠揚不盡之音杳邈難追之狀更有在字句之外者至其斜陽弔古落葉寫哀風雨言懷煙雲寄興則又如高離擊筑寡女彈絲望帝子於湘中逐成連於海上矣眾體咸備諸妙森羅莫不文由情生古與心化使性靈者而知此當無空疏之病典雅者而知此當無鈔胥之患昔田

承嗣崛強惟郭汾陽使者過境輒西望再拜曰此膝不屈於人久矣今乃爲公下拜萃於味諫果齋詩亦然意欲讀萬遍鈔萬本以自治治人而事戴追歸仍愛不忍釋爰題數語而歸諸先生以誌欽挹且明嚮往云若謂以此當元晏之序左思仲卿之序子建是爲混沌畫眉而向岱宗納土矣則小子何敢焉鄉後輩穀堂王文萃頓首拜序

味諫果齋集

王序

二

題詞

吳世培 棠園

雅擅生花筆拈來妙入神前身應是月著手自成春蘭

芷空江馥芙蓉曉日新天然雕飾去祇覺性情真

慧業由天授髻齡便解吟虹輝騰白璧風韻託青琴覽

古情何限懷人思不禁多師知有藉三益樂朋簪養素園中

坐客常滿朝夕薰陶知受益不少矣

妙絕香奩詠蘭閣唱和同豔詞流筆底雅樂奏房中花

咏詠吳齋集 題詞

泣悲朝露林虛怨夕風總悵腸斷處哀悼句彌工集中悼亡

諸作極佳

圖識春風而傾觥快讀騷放懷殊有託寄興抑何豪名

合書銀管詩堪奪錦袍藻詞摘五色 鸞掖待揮毫時

繪飲酒讀騷圖照

丁士元 謬卿

玉樹當風色皎然年時才藻已翩翩高灘大溜榕城道

猛進真如下水船

幢幢燈影伴吟魂字裏行間總淚痕根觸斷鳬零雁感最工苦語是黃門

謝 整 海聲

一枝妙筆擅王郎占斷枝頭色味香從此 昇平聽雅

頌大羅天上奏霓裳

多君推許伯牙琴流水高山邁古今慚愧未能詩律細

度人何處覓金鍼

沈葆楨 幼丹

咏詠吳齋集 題詞

王郎磊落世無儔萬象咸羅筆底收明月前身仙骨格

烏衣舊巷晉風流君為武林望族子安賦就皆驚座君詩有驚才絕艷似

四子摩詰詩多為賣愁君詩風格神肖摩詰不啻家學淵源八詠高樓遺

址在愧余無力續前修

讀騷醉態抑何奇君有飲酒讀騷圖照絕世文章絕世姿風景君

真能不負江山我亦寄相思子本杭籍讀集中覽勝懷古諸作不覺有鄉園之感

綺窗想月黃門恨集中悼亡諸篇荒徑吟秋靖節詩中

和紅樓夢菊詩見者無不歎絕倚馬雄才 朝望屬江南露布正紛

馳集中諸作冲淡則宗法王孟穠麗則頗類溫李讀竟數過殊不忍釋

王保义 鷺汀

學紹青箱富妙辭烏衣端的好門楣爭傳畫棟飛雲句
又見旗亭醉雪時摩詰春山翻舊本漁洋秋柳遜新思
明湖秋柳詩出一時和者數百人漁洋遂由是得名然
較之集中四首似乎鉛華太盛轉不若蠶國蛾眉更饒
色真建安才子知誰匹腸斷西園日暮詩

施鴻寶 可齋

挑燈細讀錦囊詩喜極翻嫌得見遲長水千秋富才調

味諫果齋集 題詞

三

阮亭一代好風姿纓絲對酒當歌處跌宕傷今弔古時
欲寫一編置行篋雲泥他日慰相思

沈秉成 仲復

心訝王郎貌天然冰雪姿賢能乃國棟儒雅真吾師君風
流蘊藉言論超凡人腕底盡瓊玉騷壇名徧馳何臆
鄙吝頓消卷舌而侍句豔思彌巧悲傷情欲
抑何曠讀騷傾玉卮君有飲酒讀騷圖
癡集中香奩詠悼慣吟戒不得信口吐新詞集中有信
已遲亡諸作絕佳爲問才人筆古今有幾枝愧予頑且鈍捉筆了無

思幸得共晨夕願君啟悟之錦囊佳製明麗風秀格老
恍置身蓬萊方丈中也

范孟蘭 庭玉

君是斷輪才我輩才不若學力兼天資全帙皆奇作水
鏡印月光色相空漠漠松雲明山峰孤高峭崿隨意
濃淡中更見品超卓寶氣冲牛斗紅日映巖壑萬頃識
大洋智襟誠磊落豪氣吞蛟螭盤旋舞秋鶚惜余會晤
遲討論尋先覺常願侍門牆修治待磨琢

味諫果齋集 題詞

四

陳汝枚 子雲

昨朝示我讀騷圖美人香草具丰骨今朝貽我歲寒詩
撐霆裂月放奇筆想其落手風雨驚狂歌斫地興飈發
爛漫同春花閒逸若野鶴或爲兒女或英雄君詩好在
無束縛餘子未免兼筆琶使我讀之唾壺擊碎叫奇絕
氣雄欲掣東海鯨韻幽恍聽雍門瑟一聲鐵笛過行雲
三弄梅花落如雪如讀黃門吟如賦河梁別才名曠代
無與徒清如鸞鳳妙無匹騷壇願執牛耳盟自率奇兵

嚴行列豪健直辟百萬軍君真飛將推人傑驅走山岳
迴波瀾神光劍氣空中躍芝城握手締古歡得見言論
丰采使我中心折子安本是人中龍仁看風送滕王閣

陸瀾生 穀泉

秀骨珊珊不染塵定知明月是前身春風楊柳詞華豔
秋水芙蓉格調新王吉視君真學士陸機於我愧詩人
年來行李匆匆束未許時將翰墨親去冬自蒲城晉省
將就聘建甯又不得時請業滿擬以詩相質今
焉文字之緣何淺也憾憾

味諫果齋集

題詞

五

查儀廷 讓泉

風流年少迴離塵夏玉敲金妙入神興寄紅蘭添逸致
韻超白燕得天真題逢枯竊思尤巧吟到悲傷句益新
稿內悼亡諸作一字一派箋稿讀完心骨沁信知明月是前身

王鳳壖 竹韻

奪得江郎筆一枝淵源遠溯畫中詩清詞麗句渾無賴
總爲多情欲賣癡

吟箋出示在他鄉剪燭談心酒百觴愧我種蓮叨末座

喜君才調繼河陽時在令尊雲笈先生幕中

洗盡鉛華見性真天生豔質墨痕新思因悲悼尤工巧
一讀佳章一愴神謂集中悼亡諸作

題味諫果齋集卽次耐久篇見懷原韻

陳慶瀛 子舫

締交縞紵勝青綾白水盟心信足憑雅抱從容鳴佩玉
清標磊落映壺冰浮沈鹽筴真廉吏管領淮壖老郡丞
諫果青燈原有味聲名記早著吳興

味諫果齋集

題詞

六

題北游草

王賓 鹿萃

讀君大作論君詩絕妙輕靈筆一枝詠古辭新徵典熟
記游句好繫人思關山寓目多添興花柳登場不染緇
手熱名香披誦久揚鞭策馬憶當時

題紫藤花館集謹次游焦山原韻

凌伯炎 耀生

鍊月鍾雲四十年儘招神妙入毫顛香名秋老淮南樹
雅調春留海上絃萬卷青箱宜詔後一篇曲水早空前
披吟何止頻低首願付弓衣播九邊

萬金生 蓮身

趨侍琴堂二十秋子安才調冠南州

尊公作宰閩南

江山陳迹

留鴻爪燕趙風懷動馬頭海上萍逢多古誼

避寇同寓東亭

中觴詠半名流焚香夜讀梅花句春雨瀟瀟與耳謀

不求雕琢自清新委婉纏絲見性真筆有聰明疑點雪

詩工醞釀便成春秋風淚溼遺珠墮南浦神傷故劍淪

欲著篇章慚學製滿林黃葉望歸人

時君旋浙葬親將返矣

王崇鼎 子調

味諫吳齋集

題詞

七

泣鬼驚神筆一枝維摩何止獨工詩十年黃卷襟懷淡

半世青衫利市遲錦繡盡焚嘔血稿珠璣賸有苦吟詞

仙霞風雨錢江月都付先生管領之

曾隨琴鶴下雲霄問字超庭更服勞華黍有聲賡東哲

蓼莪廢詠感王哀關山厯盡悲胡馬塊壘澆殘讀楚騷

更有鏡鸞分碎處淚彈荀令涇青袍

無邊愁思壓驢鞍佳句囊中子細看花柳精神詩本在

酸鹹況味宦情關孔融愛客尊常滿庾亮登樓月正寒

自笑巴人下里曲也和白雪厠吟壇

黃錫均 萍社

憶自萍蹤寄海東半年聚首太恩恩依劉幸庇仁人字

說項親承長者風

均客嶺山主公之官解凡事賴爲吹噓

保赤慈堪將父

比嶺山育嬰堂善舉

公刊有感應篇經公整頓盡美

輸丹善欲與人同

及蕉窗十則試帖覺

家鄉採訪循良迹歸去稱揚故舊中

慚愧龍門不早登此身價藉識膺增新詩捧讀欽摩詰

實政勤求法禹偁

公雅好爲詩著有歲寒樓盍載集傳世官離尹尤多善政十餘年商民稱

味諫吳齋集

題詞

八

道不置栽徧桂蘭爭挺秀贊成盆鉢久呈能三槐笑向庭

前植誰道休徵得未曾

故鄉回首舊盤桓後風光一例看豔說葵調宜學士

健稱膾設有郎官六橋隄畔曾分轡卅里湖塘宛把竿

曾見公繪有驢牽詩思圖並垂綸圖玉照畱得香痕襟上酒客中約略話更

闌

千里山川一葉舟驢歌聽徹思悠悠來逢酒醉三秋菊

去值花明五月榴

均自秋季北渡洎來年仲夏旋杭

每企才高同倚馬

公積有詩鈔待梓捧
翻慚學拙未藏鳩
萬場數月屢囑
誦一過輒心嚮往之
題詠愧難雅稱
那堪下里巴人曲也列詩壇互唱酬

王文萃 穀堂

快讀琳瑯日幾回
唾壺碎盡漏聲催
南朝情思西崑體
字字吳山頂上來

性靈怕作打油音
獺祭還防博溺心
用典如兵多益善
詩中竟有漢淮陰

最是哀蟬落葉章
不知吟斷幾回腸
勸公急付開雕手

味諫果齋集

題詞

九

愧煞人閒薄倖郎

生小多情是性靈
惺惺始解惜惺惺
紅牙幾拍郎中曲
不許關西大漢聽

一編金海囑刪除
幾度沈吟愧不如
仲寶何須招任昉
大才人自解心虛

兩淮幾輩負詩狂
誰把周時玉尺量
我學唐家田節度
將公當作郭汾陽

高山流水動人思
擬向維摩學賦詩
掩卷不禁長嘆息

達公太速識公遲

欲去何堪賦別詞
欲留又苦累妻兒
他年歸棹西湖上
長爲先生理釣絲

趙曾望 紹庭

官箴詩律兩冰清
一卷編摩萬古情
天上鶴聲傳絕調
雪中鴻爪證平生
襟懷灑脫仙爲骨
才氣銷除佛有盟
不必牢盆銘德政
卽論餘事已知名

翰墨論交近十年
那知我尙臥林泉
爲刊亥豕毫釐誤

味諫果齋集

題詞

十

得見神龍首尾全
異口何人傳世久
千秋此業讓師先
鯁生未出公將隱
一念知音一惘然

浣溪沙

孫佑培 吉生

寶鴨香濃霧卷綃
牡丹豔絕海棠嬌
紅樓深處最魂銷
閒倚屏間修笛譜
更當酒畔讀離騷
幾多月夕與花朝

曉閣寒吟絕妙詩
落花點點柳絲絲
天涯心事有鶯知
閩嶠春雲留客住
錢江秋雨送帆歸
翦鐙忽繫昔年

思

閨秀
柯漱芬

新詩詠罷正晨妝
庭院春陰護海棠
直以風騷追屈宋
台將綺麗薄齊梁
才非詠絮吟偏懶
筆爲生花夢亦香
莫更銷磨湖海氣
好將家學繼青箱

黃雲湘
荷卿

花開茵萼筆江秋
第一詩人孰與儔
卅首香奩吟彩鳳
幾篇銀漢感牽牛
青蓮慧舌才人調
綠綺靈心逸士謳

味諫果齋集

題詞

上

眞箇烏衣門第好
下風齊拜歲寒樓

金潔貞
蓉裳

郊寒島瘦太紛紛
濁世翩翩秀出羣
中表有才皆俊逸
此君無語不芳芬
吐辭最好人皆解
入耳翻疑我舊聞
昨夜相邀明月下
朗吟低唱欲凌雲

風雨孤燈把卷開
墨花疑捲怒濤來
文章磊落心千古
議論從容酒一杯
南浦春波新著作
西湖良月舊徘徊
片帆東下蘭溪水
江上芙蓉好溯洄

味諫果齋集目錄

卷一

寶日軒詩存

紅蘭館詩存

淡遠樓詩存

吟秋草

卷二

歲寒樓集

味諫果齋集

目錄

一

南游草

佐幕初草

落葉篇

佐幕續草

卷三

汜鳧草

秋水閒吟

琅風韻竹厂草

燼餘草

南劍篇

醒花池館草

定漏泉草

卷四

萍蓬詩舫草

寄萍仙里草

北游草

味諫果齋集

目錄

二

燼餘草

卷五

耐久篇

思舊篇

河西集

卷六

詩餘附

變枳集

二谿草

味諫果齋集

柴墟草

紫藤花館詩草

小乘槎集

鎖紅樓讀稿

味諫果齋集

目錄

三

味諫果齋集卷一

錢唐王汝金礪卿著

增戴元謙敬編

男儒源
繩祖孫
樹樹滋
嘉校字

同校

寶日軒詩存
吾家養素園爲友莊庵故址中有寶日軒先人讀書處也園林漸廢花木猶存邵宜風師假館其中已十稔矣歲甲申從宜風師游詩社所得卽以寶日軒名之繼繼承承用自最焉

憶梅

江南定占一林春玉照堂前色正新料得已邀騎馬客

味諫果齋集

可能先有詠花人。今朝初動羅浮想。異日須教縞袂親。
何事獨增惆悵意。幾回索笑畫簷巡。

探梅

枕上梨雲好夢回。尋芳人起鳥聲催。西溪舊友邀同賞。
東閣新詩詠別裁。籬外尋君偏寂寞。溪邊令我益徘徊。
孤山處士今安在。風雪騎驢客又來。

訪梅

料得南枝已放花。關心細問屬誰家。相逢嶺畔人曾到。

四詩沖淡有致不似
梅花身分 曾望

索笑簷前路不差。望去寒雲分掩映。歸來好句詠橫斜。悠悠漸入前溪路。翠竹蒼松一半遮。

問梅

春光動我一番思。無那梨雲夢。又遲來自故鄉。聊託訊
折憑驛使。定深知。嶺邊村落。栽千樹。雪後園林。放幾枝。
欲問花開。須出郭。西泠橋下。喚相宜。

杏花

香蜜低垂膩粉融。年年寒食曲江同。二分春釀千林雨。

味諫果齋集
卷一
寶日軒詩存

一色花香十里風。幾樹近窺牆角外。何人遙指酒村中。

桃花

露井斜陽豔。一林春風門巷去。去年心。江邊小渡人初喚。
洞口迷津客。欲尋亂落漫疑花作雨。無言還待葉成陰。
仙踪倘與安期值。醉墨淋漓石室深。

楊花

柳陌輕花糝徑時春風吹去逐游絲紛紛低舞穿簾隙

點點斜飛入硯池。一夜浮萍初幻影。十圍古樹正凝思。
因風作態渾無著。堪笑兒童捉已遲。

菜花

桃花淨盡轉風光。十里連畦一色黃。帶露烹來供野客。
繞籬開去滿江鄉。幽人宅外春生色。上已挑時蕊有香。
此日蝶飛金粉地。桑榆相映接斜陽。

蛙鼓

青草池塘科斗生。夏初時候各爭鳴。喧來鼓吹如分部。

味諫果齋集

卷一

寶日軒詩存

三

聽去官私莫辨聲。明月階前驚短夢。曉風門外續殘更。
縱饒蚓笛花間和。井底嗤他了一生。

螢燈

小草偏含大造靈。神奇一化竟爲螢。聚時遠勝分鄰火。
散處能教亂列星。十斛放來同秉燭。一囊收去好窮經。
秋宵任爾羅紈撲。依舊光凝點點青。

蟬琴

蟬噪高枝夏日長。如調絃索應宮商。槐街雨過清音發。

柳岸風來逸韻颺。彷彿金徽操夜月。依稀綠綺弄殘陽。
騷人久厭箏琶響。嘒嘒聲中納晚涼。

蚓笛

誰家玉笛出深林。欲得幽蹤傍砌尋。月下清音諧鳳律。
風前逸響學龍吟。數聲蛙鼓鳴芳徑。一曲蟬琴和夕陰。
有客倚樓聽不厭。定占新霽喜開襟。

團扇

記取嘉名是合歡。鴛機新製素齊紈。偷來明月三秋影。

味諫果齋集

卷一

寶日軒詩存

四

博得清風兩袖寬。畫擬姮娥仙桂樣。詩題蘇蕙錦文盤。
雲亭水榭相攜伴。莫作涼秋見棄歎。

竹夫人

愛爾青奴送晚涼。合將佳號錫篋管。心靈解伴三更睡。
骨瘦應銷九曲腸。別有風流羞粉黛。好隨清夢到瀟湘。
莫愁團扇秋來棄。竹枕簾牀未肯忘。

七夕詞

銀河耿耿橫空碧。風浪生憎翻永夕。一條天路幾時乾。

駢女癡牛愁遠隔金風乍向雲衢飄玉露先教楸葉凋
曝衣樓上月初出隔水盈盈橫鵲橋樓頭多少穿鍼女
良夜罇前聞笑語年年乞巧與人間未識人間巧幾許
漫開鉗盒驗蜘蛛大巧由來總若愚惟有兒家甘守拙
不將閒事擾黃姑聚太忽忽別草草夜涼恰恨雞鳴早
不知何處拾金梭銅壺漏盡天將曉

歸燕二首

秋風門巷燕將歸落月梁頭夢亦稀好是家居雲水裏

咏諫果齋集

卷十

寶日軒詩存

五

主人相送倍依依

傳聞故國是烏衣如此風霜萬里飛願得明年花信早
捲簾重待欸荆扉

秋海棠

八月春開傍短牆叢叢滿院惜無香多因有恨啼朝雨
何事含情倚夕陽紅豔淡來沾露冷檀心颺去怯風涼
前身本是離人淚江北江南總斷腸

老年

一帶深叢繞曲欄暈紅浮綠幾重看長留冶質沾霜秀
別具幽姿耐歲寒纖錦誰通千里字駐顏疑蓄九還丹
年年小草多秋色有葉無花未易殘

雁字

作陣參差勢不停唧蘆月下過寒汀揮毫似仿蟲書體
落墨偏成鳥篆形一畫煙痕開水碧半秋雲錦寫天青
數行奇字人難識須問揚家舊草亭

雁陣

咏諫果齋集

卷十

寶日軒詩存

六

似落平沙到岸前一行知是避寒天形如背水參差列
勢比常山首尾連結隊宛同諳進止排空時見變方圓
唧蘆不異銜枚勇唧唧聲來聚米邊